

Akilerartarnermi nalikilliliinerit il.il. pillugit Namminersornerullutik Oqartussat nalunaarutaat

Aningaasarsianit akilerartutit pillugit Inatsisartut inatsisaanni nr. 12, 2. november 2006-imeersumi, § 24, imm. 1, nr. 1 naapertorlugu makku aalajangersarneqartut:

Kapitali 1

Pigisat nalikillilersorneqarsinnaasut

§ 1. Nalunaarut manna makkununga atuuppoq:

- 1) Maskiinat, pequtit ingerlatsinermullu atortut assigisaat inuussutissarsiornermi atorineqartut, matumani ilanngullugit pigisat tunisassiornermi atortut, Kalaallit Nunaanni atortussiassat aatsitassanit pisut il.il. pillugit inatsit naapertorlugu ujarlernermi iluaqutiginninniarnermiluunniit atorineqartut.
- 2) Umiarsuit timmisartullu inuussutissarsiornermi atorineqartut.
- 3) Illuutit inuussutissarsiornermi atorineqartut atortullu ikkussorneqarsimasut illuummuinnaq atorineqartut kiisalu assaanerit, aqquserngit, illut iloqqasut akorni, biilit uninngasarfii, ungaluukkat assigisaallu illuummi inuussutissarsiornermi atorineqartumiittut tassungaluunniit attuumassuteqartut illuutillu ingerlanneranut atorineqartut.
- 4) Init inuussutissarsiornermi atugassatut attartorneqarsimasut sanaqqinnerini aningaasartuutit.
- 5) Pigisap pioreersup pitsaqaata (goodwill) pissarsiarineqarnerani nalinga.
- 6) Aalisagartassanut akuersissutit pissarsiarineqarneranni nalingat.
- 7) Piffissami killilimmi pisinnaatitaaffit, soorlu kisermaassilluni piginnittussaaneq, atuakkiortutut eqqumiitsuliortutullu piginnittussaaffit aammalu ilisserutitut nioqqutissalluunniit ilisarnaataannik piginnittussaanerit.
- 8) Atortunik, inuussutissarsiorluni ingerlatamut illuummulluunniit pingaaruteqartunik ikkussuineri aningaasartuutit.

Imm. 2. Naalakkersuisut akuersissuteqarsinnaapput, aallartisarnermut, misileraanermut ilisimatusarnermullu, pisariillisaanermut, illuliorfissap iluarsartuunneranut assigisaannullu aningaasartuutit aningaasarsiaqarniarnermut pingaaruteqartut aningaasarsianit akilerartuteqaataasussanit ilanngaatigineqarnissaannut.

Imm. 3. Illuutit inummit pigineqartut inissiatullu attartortinneqartut, kiisalu maskiinat, pequtit assigisaallu, taakkua ingerlannerannut atortut nalunaarummi maleruagassiani aatsaat ilaatinneqassapput piginnittup suliffeqarfutaani sulisunut attartortitsineruppat. Illuut piginnittumit inigineqarpat tamanna sulisumut attartortitsinertut isigineqassanngilaq.

Imm. 4. Sommerhus-it inummit pigineqartut, kiisalu maskiinat, pequtit assigisaallu, taakkua ingerlannerannut atortut nalunaarummi matumani maleruagassiani ilaatinneqanngillat.

Imm. 5. Pigisat aalaakkaasut, aningaasarsianit akileraarutit pillugit Inatsisartut inatsisaanni § 15, imm. 4-imi aalajangersakkani pineqartut nalunaarummi matumani maleruagassiani ilaatinneqanngillat. Immikkut ittunik pissutissaqartillugu Naalakkersuisut, nalunaarummi matumani maleruagassiat naapertorlugit pigisat aalaakkaasut, oqaaseqatigiinni siullerni taaneqartut nalikillilerneqarnissaannut akuersissuteqarsinnaapput.

Kapitali 2

Aalajangersakkat nalinginnaasut

§ 2. Ingerlatsinermut atortut, umiarsuit aamma timmisartut pissarsiarineqartutut isigineqassapput ingerlatsinermut atortoq, umiarsuaq timmisartorluunniit,

- 1) suliffeqarfimmut ingerlanneqareersumut tunniunneqarpat,
- 2) suliffeqarfup ingerlanneqarnerani atorneqartussatut siunniunneqarsimappat, aamma
- 3) ingerlatsinermi atorneqariaannangorlugu naammassineqarsimappat.

§ 3. Illuut imaluunniit atortoq ikkussorneqarsimasoq il.il. ukiumi aningaasarsiorfusumi, illuutip imaluunniit atortup ikkussorneqarsimasup il.il. pisiarineqarfiani imaluunniit sananeqarfiani, inuussutissarsiornermilu atorneqarfiani pissarsiarineqartutut isigineqassaaq. Sanaqqiinermit pitsanngorsaaneramilu aningaasartuutit ukiumi aningaasarsiorfusumi aningaasartuutigineqarfimminniit, aammalu sanaqqiinerup pitsanngorsaanerulluunniit inuussutissarsiornermut atorneqalerfianiit nalikillilerneqarsinnaapput.

§ 4. Pigisamik pitsanngorsaanermit sanaqqiinernullu aningaasartuutit pigisap pissarsiarineqarnermini nalingatut isigineqassapput.

Imm. 2. Pitsanngorsaanermit aningaasartuutit taamaallaat isigineqassapput aningaasartuutit pigisap pisiarineqarnermini pitsaanerulernissaanut atukkat.

Imm. 3. Pigisap ajoqusersimappat pitsanngorsaanermit aningaasartuutit taamaallaat isigineqassapput aningaasartuutit pigisap ajoqusinnginnermini pitsaanerulernissaanut atukkat.

§ 5. Pigisamik ajoqusersimasumik iluarsaanermut aningaasartuutit ukiumi aningaasarsiorfusumi iluarsaanneqarfiani aningaasarsianit akileraaruteqaataasussanit ilanngaatineqassapput.

Imm. 2. Ajoqusernerli sillimasiinermit imaluunniit taarsiiffigisaanermit aningaasanik tunniussinermik nassataqarpat, ilanngaatineqarsinnaasoq taamaallaat tassaavoq iluarsaanermut aningaasartuutit sillimasiinermit taarsiiffigineqarnermilluunniit aningaasanik tunniussanit amerlaneruppata taakkua nikingassutaat. Sillimasiinermit imaluunniit taarsiiffigineqarnermit aningaasat tunniunneqartut iluarsaanermut aningaasartuutit amerlaneruppata, aningaasat amerlanerussutaasut ukiumi aningaasarsiorfimi tunniunneqarfianni aningaasarsiat akileraaruteqaataasussat naatsorsorneranni ilanngunneqassapput.

Imm. 3. Iluarsaanermi aningaasartuutit isigineqassapput aningaasartuutit pigisap ajoqusinnginnermini ileqqutatut iluarsaanermut atukkat.

§ 6. Pigisat kingornussinikkut, agguanertaqanngitsumik ataatsimut pigisat aappaarisap toqunerani pigiinngassanngortinnerisigut, pisortanit suliarineqanngitsumik aappaasumut sivilunerusumik inuusumut pisassanngortinnerisigut imaluunniit aappariit pigisaminnik agguanerisigut pissarsiarineqarsimappata, taava pigisat nalunaarummi matumani aalajangersakkat tunngavigalugit kingornussisutut pissarsisumit aappaasumilluunniit pissarsisumit, toqusimasumit aappaasumilluunniit piffissani pissarsiarineqarfiini pissarsiarineqarnerinilu nalingisut nalilerlugit pissarsiarineqartutut

isigineqassapput, nalikilliliissutaasimasinnaasullu pissarsisumit nalikillilernerqarsimasutut isigineqassallutik.

§ 7. Pigisat tunissutitut kingornussarsiasanilluunniit siumoornikkut pissarsiarineqarsimappata, piffissami pissarsiarineqarfianni tunineqassasuugunik nalingat pissarsiarineqarneranni nalingattut isigineqassaaq.

Pigisat tunissutitut kingornussarsiasatulluunniit siumoortitsinikkut tunniunneqartut, piffissami tunniunneqarfianni tunineqassasuugunik nalingat tunineqarneranni nalingattut isigineqassaaq.

§ 8. Pigisanik privatiinnavimmik atorneqaraluartunik tamakkiisumik ilaannakuusumilluunniit inuussutissarsiornermut atuilerneq kiisalu pigisanik nunanit allanit imaluunniit Danmarkimit Savalimmiunillu suliffeqarfimmut Kalaallit Nunaanni akileraartussaataasumut nuussineq pisinertut isigineqassaaq. Pissarsiarineqarneranni nalingattut isigineqassaaq piffissami atuinermik allanngortitsiffimmi/nuussiffimmi tunineqassasuugunik nalingat.

Imm. 2. Pigisanik tamakkiisumik ilaannakuusumilluunniit inuussutissarsiornermut atorneqaraluartunik privatiinnavimmik atuilerneq kiisalu pigisanik suliffeqarfimmit Kalaallit Nunaanni akileraartussaataasumit nunanut allanut imaluunniit Danmarkimut Savalimmiunullu nuussineq tunisinertut isigineqassaaq. Tunisineri nalingattut isigineqassaaq piffissami atuinermik allanngortitsiffimmi/nuussiffimmi tunineqassasuugunik nalingat.

Imm. 3. Pigisanik inuussutissarsiornermut tamakkiisumik atorneqartunik inuussutissarsiornermut ilaannakuusumik atuilerneq, taassumaluunniit paarlattua tunisinertut pisinertullu isigineqassaaq. Tunisineri pissarsiarineqarnerannilu nalingattut isigineqassaaq piffissami atuinermik allanngortitsiffimmi tunineqassasuugunik nalingat.

Imm. 4. Pigisat Kalaallit Nunaata avataani inuussutissarsiornermut atorneqartut, kingusinnerpaamik piffissami tamakkiisumik akileraartussaataanerup kipinerani tunineqartutut isigineqassapput. Tunisineri nalingattut isigineqassaaq piffissami tassani tunineqassasuugunik nalingat. Aalajangersagarli manna naapertorlugu iluanaarutit nalikilliliissutaasimasunit annerusinnaanngillat.

§ 9. Illuutit il.il. § 1, imm. 3-mi aamma § 22, imm. 1-imi taaneqartut inuussutissarsiuugalugu suliffeqarfimmik piginnittumit sulisorineqanngitsunut attartortinneqarnerminniit sulisuusunut tamakkiisumik ilaannakuusumilluunniit attartortinneqalerpata tamanna pisinertut isigineqassaaq. Pissarsiarineqarneranni nalingattut isigineqassaaq piffissami atuinermik allanngortitsiffimmi tunineqassasuugunik nalingat.

Imm. 2. Illuutit § 1, imm. 3-mi aamma § 22, imm. 1-imi taaneqartut inuussutissarsiuugalugu suliffeqarfimmik piginnittup sulisuinut tamakkiisumik ilaannakuusumilluunniit attartortinneqarnerminniit sulisuunngitsuinnarnut attartortinneqalerpata, piffissallu qaammatinik tallimanik sivilissusillip iluani illuutit inuussutissarsiuugalugu suliffeqarfimmik piginnittup sulisuinut tamakkiisumik ilaannakuusumilluunniit attartortinneqaqqilinggippata tamanna tunisinertut isigineqassaaq. Tunisineri nalingattut isigineqassaaq piffissami atuinermik allanngortitsiffimmi tunineqassasuugunik nalingat.

§ 10. Pigisat atorsinnaajunnaarluni aserorpat tamanna tunisinertut isigineqassaaq. Tunisineri nalingatut isigineqassaaq aserornerani sillimmasiinnermit imaluunniit taarsiiffigisaanikkut aningaasat tunniunneqarsimasinnaasut annertoqataat.

§ 11. Pigisat naalagaaffiup piumasaa malillugu pinngitsoorani naalagaaffimmut kommuunimulluunniit tunniussinissaq (taartisiaqarluni) taarsiiffiginninnertalimmik pinngitsaaliinikkut arsaarinnissutigippatigit taarsiiffiginnissutit tunisinermi nalingattut isigineqassapput.

§ 12. Pigisatq tunineqarpat imaluunniit naalagaaffiup piumasaa malillugu pinngitsoorani naalagaaffimmut kommuunimulluunniit tunniussinissaq taarsiiffiginninnertalimmik pinngitsaaliinikkut arsaarinnissutigippassuk, imaluunniit atorsinnaajunnaarluni aserorpat Naalakkersuisut akuersissutigisinnaavaat, iluanaarutit akileraaruteqaataasussat ukiumi tunineqarfiani/pigiunnaarneqarfiani aningaasarsianut akileraaruteqaataasussanut ilanngunneqannginnissaat, tassungali taarsiullugu ukiumi aningaasarsiorfusumi tulluuttumi pigisap assingusup pissarsiarineqarnerani nalinganit ilanngaatineqarnissaat.

Imm. 2. Akuersissuteqarnissamut ilaatigut tunngaviussaaq ukiup pigisamik tunisiffiup/piginnikkunnaarfiup tulliani, ukiup aningaasarsiorfusup naannginnerani tassunga assingusumik pissarsisoqarnissaa, kiisalu iluanaarutit akileraaruteqaataasussat tamarmiusut pigisap nalinganit nalikillilerneqarsinnaasumit ilanngaatineqarsinnaanissaat. Naalakkersuisut, oqaaseqatigiinni siullerni killissaritinneqartoq sivitsorsinnaavaat.

Imm. 3. Aalajangersakkamik matumannga atuinnissamut qinnuteqaat kingusinnerpaamik tunniunneqassaaq ukiumi tunisiffiusumi/piginnikkunnaarfimmi nammineerluni nalunaarsuiffimmik tunniussinissamut killissarititap naanerani.

Imm. 4. Piffissarititaasup imm. 2-mi aalajangersarneqartup naannginnerani pigisamut assingusumik pisaartoqanngippat, imaluunniit iluanaarutit akileraaruteqaataasussat ukiumi pissarsiffiusumi pigisap nalikillilerneqarsinnaasup nalinganit ilanngaatineqanngippata, iluanaarutit ukiumi tunisiffiusumi/piginnikkunnaarfimmi aningaasarsianut akileraaruteqaataasussanut ilanngunneqassapput.

§ 13. Pigisamik qularnaveequsiinikkut taarsigassarsianut aningaasartuutit, tamatumani ilaallutik pappiaraatit nalikillineri, pissarsiarineqarnerani nalinganut pitsanngorsarneraniluunniit aningaasartuutitut naatsorsuunneqarsinnaanngillat, Naalakkersuisut akuersissuteqarsimanngippata.

Imm. 2. Pissarsiarineqarnerani nalingata naatsorsornerani erhvervsstøtte pillugu Inatsisartut peqqussutaat aammalu takornariartitsinermik inuussutissarsiateqarnermut aningaasalersuinikkut tapersiisarneq pillugu Inatsisartut inatsisaat naapertorlugit taarsigassarsiat erniaqaratillu taarsersugassaanngitsut ilanngunneqassanngillat. Taarsigassarsiat akileqquneqarpata pissarsiarinerani nalinga taakkunannga qaffanneqassaaq.

§ 14. Nalikilliliissutaasimasut appartinneqassappata § 16 imaluunniit § 26, imm. 1 aamma 5 naapertorlugit, appaanissap qanoq pinissaa akileraartussaataitaasup nammineerluni aalajangissavaa.

Imm. 2. Imm. 1-imi periarfissiissutigineqartumik atuinnissaq akileraartussaataitaasup kissaatiginngippagu, pigisanut tamanut nalikilliliissutigineqarsimasut agguataarinikkut appartinneqassapput.

Imm. 3. Aningaasarsiat akileraaruteqaataasussat qaffanniarneqarnerannik nalunaarfigineqarnermiit ullut 14-it qaangiutsinnagit akileraartussaataitaasup oqartussaasunut akileraarusiisussanut allakkatigut qinnutigisinnaavaa, § 16 imaluunniit § 26, imm. 1 aamma 5 naapertorlugit nalikilliliinerujumalluni. Nalikilliliinerussutigiumasat naatsorsorneqarfiat kiisalu taakku pigisanut nalikillilerneqarsinnaasunut agguataarneqarfiat qinnuteqarnermi ilanngunneqassapput.

Imm. 4. Qaffaassutaasup ilaata akileraartussaataitaasumik akisussaatisinermik nalilerneqartup akuerineqarnissaa qinnuteqarnermi naatsorsuutigineqarsinnaanngilaq.

§ 15. Pigisat nalunaarummi matumani pineqartut nalikillilerneqareersimallutik nalingi, pigisat naatsorsorneranni nalilunneqassapput.

Kapitali 3

Inuit

§ 16. Immikkoortumi matumani maleruagassiat naapertorlugit inuit akileraarutitigut nalikilliliissutigisinnaasaasa annerpaaffissaat tassaavoq ukiumi aningaasarsiorfiusumi namminersorluni inuussutissarsiutigalugu suliffeqarfimmik ingerlatsinikkut isertitat annertoqataat.

Pigisat inuussutissarsiornerinnarmi atorineqartut

§ 17. Pigisat nalikillilerneqarsinnaasut inuussutissarsiornerinnarmi atorineqartut pissarsiarineqarneranni nalingi tamakkerlugit inuit aningaasarsiaminnit akileraaruteqaataasussanit ilanngaatisinnaavaat, takuulli § 16.

Imm. 2. Peqatigiinni assigiinngitsunik akisussaassuseqartunik ilaasortalinni peqataasunut (kommanditistitut) atuuppoq, pissarsiarineqarneranni nalingi aatsaat ilanngaatigineqarsinnaallutik, ilanngaat ukiumi pineqartumi ingerlatsinermi amigartoorutaasimasinnaasunik ilanngaareernikkut peqataasup (kommanditistip) ilanngaatissatut kontuani sinneruttunit matussuserneqarsinnaappat.

Imm. 3. Pissarsiarineqarneranni nalingi ukiumi pissarsiarineqarfianni tamakkiisumik ilanngaatigineqanngippata, taava pissarsiarineqarneranni nalingisa ilaat nalikillilerneqarsimanngitsut ukiumi tullermi kingusinnerusumiluunniit ilanngaatigineqarsinnaapput.

§ 18. Pigisat nalikilliliissutigineqarsinnaasoq tunineqarpat, ukiumi tunineqarfiani nalikilliliineq pisinnaanngilaq.

Imm. 2. Pigisat pissarsiarineqarnerani nalingata ilaanit nalikillilerneqarsimanngitsumit qaffasinnerusumik akilersillugu tunineqarpat, iluanaarutit ukiumi tunineqarfiani aningaasarsianut akileraaruteqaataasussanut ilanngunneqassapput.

Imm. 3. Pigisat pissarsiarineqarnerani nalingata ilaanit nalikillilerneqarsimanngitsumit minnerusumik akilersillugu tunineqarpat, ajunaarutit ukiumi tunineqarfiani aningaasarsianit akileraaruteqaataasussanit ilanngaatigineqarsinnaapput.

Imm. 4. Tamakkiisumik nalikilliliisoqarianngitsoq illuut isaterneqarpat, nalinga sulit nalikilliliissutaasimanngitsoq, isaternerlukut il.il. tunineqassappata akiannik ilanngarlugu ukiumi isaterneqarfiani aningaasarsianit akileraaruteqaataasussanit ilanngaatigineqarsinnaavoq.

Pigisat inuussutissarsiornermi privatimillu atorineqartut

§ 19. Pigisat nalikillilerneqarsinnaasut inuussutissarsiornermi privatimillu atorineqartut pissarsiarineqarneranni nalingi, ingerlatsinermi atortup inuussutissarsiornermi atorineqarnerata tamarmiusumillu atorineqarnerata imminnut nikinganerannut naleqquttumik, ukiumi pissarsiarineqarfianni aningaasarsianit akileraaruteqaataasussanit ilanngaatigineqarsinnaapput, takuulli § 16.

Imm. 2. Pissarsiarineqarneranni nalingisa ilaat, inuussutissarsiornermi atorineqarnerannut naapertuuttut ukiumi pissarsiarineqarfianni tamakkiisumik ilanngaatigineqanngippata, taava taakkua ilaat nalikillilerneqarsimanngitsut ukiumi tullermi kingusinnerusumiluunniit ilanngaatigineqarsinnaapput. Katillugit nalikillilerneqarsinnaasut tassatuaapput pissarsiarineqarneranni nalingisa ilaat, ingerlatsinermi atortup ukiumi nalikilliliiffiusumi inuussutissarsiornermi atorineqarnerata tamarmiusumillu atorineqarnerata imminnut nikinganerannut naleqquttut.

Imm. 3. Ukiumi aningaasarsiorfiusumi pineqartumi tamarmiusumik atorineqarnerisa minnerpaamik affaat inuussutissarsiornermi atorineqarpat nalikilliliineq aatsaat pisinnaavoq.

§ 20. Illuutit atortullu ikkussorneqarsimasut il.il. inuussutissarsiornermi privatimillu atorineqartut pissarsiarineqarneranni nalingi, illuutip naqqata annertussusiata inuussutissarsiornermi atorineqarnerata illuutillu tamarmiusumik atorineqarnerata imminnut nikinganerannut naleqquttumik, ukiumi pissarsiarineqarfianni aningaasarsianit akileraaruteqaataasussanit ilanngaatineqarsinnaapput.

Imm. 2. Pissarsiarineqarneranni nalingisa ilaat, inuussutissarsiornermi atorineqarnerannut naapertuuttut ukiumi pissarsiarineqarfianni tamakkiisumik ilanngaatineqanngippata, taava taakkua ilaat nalikillilerneqarsimanngitsut ukiumi tullermi kingusinnerusumiluunniit ilanngaatineqarsinnaapput.

Illuutip atorineqarnera, illuutip naqqata annertussusiata inuussutissarsiornermi atorineqartup annertusineranik kinguneqartumik allannguuteqarpat, nalikilliliineq taassuma annertoqataanik qaffanneqarsinnaavoq.

Imm. 3. Illuutip ukiumi aningaasarsiorfiusumi pineqartumi tamarmiusumik atorineqarnerata minnerpaamik affaa inuussutissarsiornermi atorineqarpat imaluunniit illuutip naqqata inuussutissarsiornermi atorineqartup annertussusia minnerpaamik 100 kvm-iuppat nalikilliliineq aatsaat pisinnaavoq.

§ 21. Pigisaq § 19-imi imaluunniit § 20-mi taaneqartoq tunineqarpat ukiumi tunineqarfiani nalikilliliineq pisinnaanngilaq. Iluanaarutit naatsorsorneqartut tassaassapput, tunineqarnerani nalingata aamma ukiup tunineqarfia aallartinnerani nalingata nalikillilerneqanngitsup, ukiumi tunineqarfiani pitsanngorsaataasimasinnaasunik ilaneqartup assignngissutaat. Tunineqarnerani nalingata pissarsiarineqarnerani nalinganit qaffasinneruneratigut iluanaarutit, pigisap pigineqarnerani ukiumi aningaasarsiorfiusumi sumiluunniit inuussutissarsiornermi atorineqarnerata procentinngorlugu annerpaap annertoqataattut ukiumi tunineqarfiani aningaasarsianut akileraaruteqaataasussanut ilanngunneqassapput.

Imm. 2. Pigisaq pissarsiarineqarnerani nalingata ilaanit nalikillilerneqarsimanngitsumit minnerusumik akilersillugu tunineqarpat, ajunaarutit ukiumi tunineqarfiani aningaasarsianit akileraaruteqaataasussanit ilanngaatineqarsinnaapput. Taamaattorli ilanngaatiq nalikilliliissutaareersullu katillutik, § 19 aamma § 20 naapertorlugit nalikilliliissutaasinnaasimagaluartut sinnersinnaanngilaat.

Imm. 3. Tamakkiisumik nalikilliliisoqarianngitsoq illuut isaterneqarpat, nalinga sulii nalikilliliissutaasimanngitsoq, isaternerlukut il.il. tunineqassappata akiannik ilanngarlugu ukiumi isaterneqarfiani aningaasarsianit akileraaruteqaataasussanit ilanngaatineqarsinnaavoq. Taamatuttaaq atuutissaq imm. 2-mi oqaaseqatigiit aappaanni aalajangersagaq.

Illuutit inissiat sulisunut sulisuunngitsunullu attartortinneqartut

§ 22. Illuutit atortullu ikkussorneqarsimasut il.il. sulisunut sulisuunngitsunullu inissiatut attartortinneqartut pissarsiarineqarneranni nalingi, illuutip ilaata piginnittut ataasiakkaat sulisuinut attartortinneqartup aamma illuutip naqqata annertussusiata tamarmiusup piginnittumit pigineqartup imminnut nikinganerannut naleqquttut, ukiumi pissarsiarineqarfianni aningaasarsianit akileraaruteqaataasussanit ilanngaatineqarsinnaapput, takuulli § 16.

Imm. 2. Pissarsiarineqarnerani nalingata ilaa, illuutip tamarmiusup ilaata piginnittut ataasiakkaat sulisuinut attartortinneqartup aamma illuutip naqqata annertussusiata tamarmiusup piginnittumit pigineqartup imminnut nikinganerannut naleqquttoq, ukiumi pissarsiarineqarfiani tamakkiisumik ilanngaatineqanngippat, taava taassuma ilaa nalikillilerneqarsimanngitsoq ukiumi tullermi

kingusinnerusumiluunniit ilanngaatineqarsinnaavoq.

Imm. 3. Ukiumi aningaasarsiorfusumi pineqartumi piginnittut ataasiakkaat illuutaata naqqata annertussusiata tamarmiusup minnerpaamik affaa piginnittut ataasiakkaat sulisuinut attartortinneqarsimappat nalikilliliineq aatsaat pisinnaavoq.

§ 23. § 1, imm. 3-mi maleruagassiaq apeqqutaatinagu, illuutit sulisunut sulisuunngitsunullu attartortinneqartut taamaallaat ukiumi aningaasarsiorfusumi pineqartumi nalikillilerneqarsinnaapput, piginnittup pigisaata minnerpaamik affaa ukiup aningaasarsiorfusup ingerlanera tamaat piginnittup sulisuinut attartortinneqarsimappat. Taamaassimappat taassuma annertussusianut naleqquttumik nalikilliliisoqarsinnaavoq.

§ 24. Illuut sulisunut sulisuunngitsunullu attartortinneqartoq tunineqarpat ukiumi tunineqarfiani nalikilliliineq pisinnaangilaq. Iluanaarutit naatsorsorneqartut tassaassapput, tunineqarnerani nalingata aamma ukiup tunineqarfia aallartinnerani nalingata nalikillilerneqanngitsup, ukiumi tunineqarfiani pitsanngorsaataasimasinnaasunik ilaneqartup assigiinngissutaat. Tunineqarnerani nalingata pissarsiarineqarnerani nalinganit qaffasinneruneratigit iluanaarutit, illuutip pigineqarnerani ukiumi aningaasarsiorfusumi sumiluunniit sulisunut attartortinneqarnerata procentinngorlugu annerpaap annertoqataatut ukiumi tunineqarfiani aningaasarsianut akileraaruteqaataasussanut ilanngunneqassapput.

Imm. 2. Illuutip pissarsiarineqarnerani nalingata ilaanit nalikillilerneqarsimanngitsumit minnerusumik akilersillugu tunineqarpat, ajunaarutit ukiumi tunineqarfiani aningaasarsianit akileraaruteqaataasussanut ilanngaatineqarsinnaapput. Taamaattorli ilanngaatiq nalikilliliissutaareersullu katillutik, § 22-mi aamma § 23-mi maleruagassat naapertorlugit nalikilliliissutaasinnaasimagaluartut sinnersinnaangilaat.

Imm. 3. Tamakkiisumik nalikilliliisoqarianngitsoq illuut isaternerqarpat, nalinga sulit nalikilliliissutaasimanngitsoq, isaternerlukut il.il. tunineqassappata akiannik ilanngarlugu ukiumi isaternerqarfiani aningaasarsianit akileraaruteqaataasussanut ilanngaatineqarsinnaavoq. Taamatuttaaq atuutissaq imm. 2-mi oqaaseqatigiit aappaanni aalajangersagaq.

Paasissutissiisussaatitaaneq

§ 25. Namineerluni nalunaarsuiffimmik tunniussinnermut atatillugu akileraartussaatitaasup pigisat nalikillilerneqarsinnaasut pissarsiarineqarneranni nalingi piffissallu pissarsiarineqarfii, taakku inuussutissarsiornermi atorineqarnerisa annertussusiata kiisalu pigisat ukiumi aningaasarsiorfusumi tunineqartut tunineqarneranni nalingi paasissutissiissutigissavai. Pigisanut pissarsiarineqarneranni 50.000 kr.-nit taakkualuunniit inorlugit nalilinnut aammalu inuussutissarsiornerinnarmi atorineqartunut taamaallaat paasissutissiissutigineqartussat tassaapput pigisat taakkua pissarsiarineqarneranni nalingi tamarmiusut. Paasissutissat Akileraartarnermi Pisortaqrifiup ilusilersugaanut allattorlugit nalunaarneqassapput.

Kapitali 4

Selskabit il.il.

§ 26. Selskabit il.il., pigisanut § 1 naapertorlugu nalikillilerneqarsinnaasunut akileraarutitigit nalikilliliissutigisinnaasaat annerpaaq tassaavoq, imm. 2 naapertorlugu nalikilliliissutigineqarsinnaasut katillutik annertussusiata, selskabip akileraarutissat ilanngaatigitinnagit sinneqartoorutaasa akileraaruteqaataasussat, taamaattorli imm. 2 aamma 5 naapertorlugit akileraarutitigit nalikilliliissutinik

ilanngariikkat affaattut annertutigisumik ilasat.

Imm. 2. Ukiumi ataatsimi akileraarutitigut nalikilliliissutigineqarsinnaasut annerpaaffissaat imaapput:

a) Illuutit atortullu ikkussorneqarsimasut il.il. pissarsiarineqarneranni nalingisa ukiumut 5 procentiat tikillugu.

b) Umiarsuit timmisartullu pissarsiarineqarneranni nalingisa ukiumut 10 procentiat tikillugu.

c) Aningaasartuutit il.il. imaluunniit ingerlatsinermut atortut, pequtit aammalu pigisat tigussaasuunngitsut il.il. pissarsiarineqarneranni nalingi nalikillilernerqarsinnaasut, ukiup aningaasarsiorfusup naanerani nalingisa nalikillilernerqarsinnaasut 30 procentiat tikillugu nalikillilernerqarsinnaapput.

d) Pigisanut litra c-mi taaneqartunut aningaasartuutit imaluunniit pissarsiarineqarneranni nalingisa ukiumut 100 procentiat tikillugu, pigisanut ataasiakkaanut aningaasartuutit imaluunniit pissarsiarineqarneranni nalingi 100.000 kr.-iuppata taakkualuunniit inorpatigit.

Imm. 3. Aningaasartuutit imaluunniit pigisat il.il. imm. 2-mi litra c-mi d-milu taaneqartut nalikillilernerqarsinnaasut ataatsimut kontulerlugit selskabit naatsorsortassavaat. Ukiup aningaasarsiorfusup naanerani nalikilliliissutigineqarsinnaasut nalingi tunngavigalugit ukiumi nalikilliliinerit pisassapput. Nalingat taanna tassaassaaq, ukiup aningaasarsiorfusup aallartinnerani nalingat ukiumi aningaasarsiorfusumi ingerlatsinermut atortunut il.il. aningaasartuutit imaluunniit pissarsiarineqarneranni nalinginik ilasaq, kiisalu ingerlatsinermut atortut il.il. ukiumi aningaasarsiorfusumi tunineqartut tunineqarneranni nalinginik aammalu imm. 2-mi litra d naapertorlugu nalikilliliissutinik ilanngagaq. Pitsanngorsaannerimut aningaasartuutit, pissarsiarineqarneranni nalingisa pineqarnerattut pineqassapput. Ukiup aallartinnerani nalingat tassaavoq, ingerlatsinermut atortunut il.il. aningaasartuutit imaluunniit pissarsiarineqarneranni nalingisa ukiuni aningaasarsiorfusuni siusinnerusuni nalikillilernerqareernermikkut naligilersimasaat.

Imm. 4. Pigisat il.il. imm. 2-mi litra c-mi d-milu taaneqartut tunineqarnerisigut naligilersimasaat nalikillilernerqarsinnaasooq qimmorneqarpat, taava iluanaarutinngortut ukiumi aningaasarsiorfusumi tassani isertitatut nalunaarneqassapput.

Imm. 5. Imm. 2-mili maleruagassiaq apeqqutaatinagu, selskabip il.il. akileraarutitigut nalikilliliissutigisinnaavai pigisanik nalikillilernerqarsinnaasunik imm. 2-mi litra a-mi b-milu taaneqartunik tunisnermi iluanaarutit akileraaruteqaataasussat naatsorsorneqarsimasut annertoqataat. Aningaasarsiat akileraaruteqaataasussat matuma kingorna amigartoorinngorpata, taava akileraarutitigut nalikilliliissutit amigartoorutit annertoqataannik appartinneqassapput.

§ 27. Illuutit atortullu ikkussorneqarsimasut il.il. immikkut nalikillilernerqassapput, illuutit atortullu taakkununga ikkussorneqarsimasut il.il. ataasiakkaarlugit. Illuutit il.il. tunineqarpat, ukiumi tunineqarfiani nalikilliliisoqarsinnaanngilaq.

§ 28. Illuut pissarsiarineqarnerani nalingata ilaanit nalikillilernerqarsimanngitsumit qaffasinnerusumik akilersillugu tunineqarpat, iluanaarutit ukiumi tunineqarfiani aningaasarsianut akileraaruteqaataasussanut ilanngunneqassapput.

Imm. 2. Illuut pissarsiarineqarnerani nalingata ilaanit nalikillilernerqarsimanngitsumit minnerusumik akilersillugu tunineqarpat, ajunaarutit ukiumi tunineqarfiani aningaasarsianit akileraaruteqaataasussanit ilanngaaticigineqarsinnaapput.

Imm. 3. Tamakkiisumik nalikilliliisoqarianngitsoq illuut isaterneqarpat, nalinga sulii nalikilliliissutaasimanngitsoq, isaternerlukut il.il. tunineqassappata akiannik ilanngarlugu ukiumi isaterneqarfiani aningaasarsianit akileraaruteqaataasussanit ilanngaaticigineqarsinnaavoq.

§ 29. Umiarsuit timmisartullu immikkut nalikillilerneqassapput, umiarsuit timmisartullu ataasiakkaarlugit. Umiarsuit imaluunniit timmisartut tunineqassappata, ukiumi tunineqarfiani nalikilliliisoqarsinnaangilaq.

§ 30. Umiarsuaq timmisartorluunniit pissarsiarineqarnerani nalingata ilaanit nalikillilerneqarsimanngitsumit qaffasinnerusumik akilersillugu tunineqarpat, iluanaarutit ukiumi tunineqarfiani aningaasarsianut akileraaruteqaataasussanut ilanngunneqassapput.

Imm. 2. Umiarsuaq timmisartorluunniit pissarsiarineqarnerani nalingata ilaanit nalikillilerneqarsimanngitsumit minnerusumik akilersillugu tunineqarpat, ajunaarutit ukiumi tunineqarfiani aningaasarsianit akileraaruteqaataasussanit ilanngaatineqarsinnaapput.

§ 31. Maskiinat, pequtit ingerlatsinermullu atortut assigisaat, ininik attartukkanik sanaqqiineq, pigisap pioreersup pitsaaqutaa (goodwill), aalisagartassanut akuersissutit, piffissami killilimmi pisinnaatitaaffit aamma atortut ikkussuutat kinguliini taagorneqarput ingerlatsinermut atortut.

Imm. 2. Ukiumi aningaasarsiorfusumi nalikilliliissutigineqartunut tunngaviussapput ukiup aningaasarsiorfusup naanerani nalikilliliissutigineqarsinnaasut nalingi. Nalingat taanna tassaassaaq, ukiup aningaasarsiorfusup aallartinnerani nalingat ukiumi aningaasarsiorfusumi ingerlatsinermut atortut pissarsiarineqarneranni nalinginik ilasaq, kiisalu ingerlatsinermut atortut ukiup aningaasarsiorfusup ingerlanerani tunineqartut tunineqarneranni nalinginik aammalu § 26, imm. 2, litra d naapertorlugu ukiumi nalikilliliissutinik ilanngagaq. Ukiup aallartinnerani nalingat tassaavoq, ingerlatsinermut atortunut aningaasartuutit ukiuni aningaasarsiorfusuni siusinnerusuni nalikillilerneqareernermikkut naligilersimasaat.

Paasissutissiisussaataitaneq

§ 32. Selskabit il.il. ingerlatsinermut naatsorsuutini nammineerluni nalunaarsuiffimmut ilanngunneqartuni illuutit, umiarsuit aamma timmisartut ataasiakkaat pillugit makku paasissutissiissutigissavaat:

- 1) Ukioq pissarsiarineqarfiat.
- 2) Piffissaq pissarsiarineqarfiat.
- 3) Pissarsiarineqarneranni nalingat.
- 4) Ukiuni aningaasarsiorfusuni siusinnerusuni nalikilliliissutaasimasut.
- 5) § 26, imm. 2, litra a aamma b naapertorlugit ukiumi aningaasarsiorfusumi matumani nalikilliliinerit.
- 6) § 26, imm. 5 naapertorlugu ukiumi aningaasarsiorfusumi matumani nalikilliliinerit.
- 7) § 26, imm. 1 naapertorlugu ukiumi aningaasarsiorfusumi matumani nalikilliliinerit.

Atortuulerfia

§ 33. Nalunaarut 1. januar 2007-imi atuutilissaaq.

Imm. 2. Ilutigitillugu Namminersornerullutik Oqartussat akileraartarnermut nalikilliliisarnerit il.il pillugit nalunaarutaat nr. 44, 20. december 2001-imeersoq atorunnaarsinneqarpoq

Namminersornerullutik Oqartussat, ulloq 1. december 2006

/

Kaare Hagemann

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut